

Kontuola

ANTZUOLA / Egubakoitza / 2003ko abenduaren 12a / 182. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Kontzertua eskainiko dute musika ikasten ari diren gaztetxoek

ENEIDA ITURBE

Gabon inguruan Bergarako Musika Eskolan ikasten diharduten neska-mutil antzularrek kontzertua ematen dute herrian. Aurten ere hala egingo dute; martitzenean izango da kontzertua, udaletxeko bilkuren aretoan, arratsaldeko 19:00etan.

Gaiean ditugu Gabonak, eta laster hasiko dira horien inguruan antolatzen diren ekitaldiak. Datorren astean, esate baterako, Bergarako Musika Eskolan ikasten ari diren herriko neska-mutilek kontzertua eskainiko dute. Kontzertu hori urtero egiten dute Gabon inguruan. Aurten martitzenean izango da, arratsaldeko 19:00etan, udaletxeko bilkuren aretoan.

Berrogeita hamar bat antzularrek hartuko dute parte kontzertu horretan, 7 urtetik hasi eta 18 urte bitartekoak. Errepertorio zabala eskainiko dute; hori bai, asko Gabonetako abestiak izango dira.

Klarineta, txistua, gitarra, flauta, oboea, soinua eta biolontxelo dira herriko gaztetxoek jotzen dituzten instrumentueta-



Musika Eskolako ikasleek kontzertua egingo dute martitzenean, 19:00etan, udaletxeko aretoan.

ko batzuk. Abestiak bakarka, bikoteka zein pianoaren laguntzarekin joko dituzte.

BUKAERA BEREZIA

Orain arte trikitiaren soinu alaiarekin amaitu izan dute kontzer-

tua Musika Eskolakoek, baina aurten Ken 7 taldearen *Ilargia* abestia joaz eta kantatuaz eman go diote amaiera. Gitarrak, biolina eta biolontxeloaren musika eta Hizkuntza Musikaleko 1. eta 2. mailan dauden umeen ahotsak

izango dira protagonista abesti horretan.

Abestuko duten neska-mutikoek ez dute Hizkuntza Musika ikastera Bergarara joan beharrik izaten, lehenengo bi mailak Antzuolan ematen dituzte-eta.

HERRITARREN HITZA / Karmele San Sebastian • Erretiratua

Urte zaharrari agurra, berriari eskaera

Bi mila eta hirugarren urtia be badoiarkigu, bihar bada guk nahi baino bixkorrago, ze emoten dau eguneko 24 orduak segundo bihurtu dirala. Baina bizitzaren legia danez, onartzia besterik ez jaku geratzen.

Berrixaren atarixan sartu garen honetan, urtian zihar hainbat proiektu, buru hauste eta ekintza izan dittugu, eta orain danen baloraziñua egitteko garaixan gare. Baloraziño honen ondorixuak gehixenetan egitten dittuanaren kriterixuaren araberakuak izaten dira. Batzuk, atseginak, pozgarririk, barrena baterik

eta lasai lagatzen doskuenak. Baina, dana gazi-gozua izaten danez, beste gauza batzuk halako ezadostasun puntu bat sortzen doskue, batez be egin barik, mahai gainian geratzen diran horrek. Aurrekua aittatuta, esan geinke aurrera begira tinko eta itsaropentsu segitzeko gogorik ez dogula falta.

Urtiaren akabera honetara arrimatuz bagoiaz eta, badira, laster izango diran egun berezi



"Lokal berrixa, etxe babestuak eta eguneko ospitala"

honetan, oso hunkigarrixak egitten jakun pertsonaiak, Olentzero eta Erregiak hain zuzen be. Pertsonaia honek esku zabal eta bihotz haundikotzat dauzkagu, eta hori dala eta, zenbait eskaera luzatzen jeku egun honetan, eta gu be, Erretiratuen

Elkartetik, bagatoz eskaera horrekin.

Datorren urtean ondorengok martxan ikustia nahiko

ginuzke: guretako lokal berrixa, etxe babestuak eta eguneko ospitalea izango dan etxia. Zergatik gauza honek? Arlo beharrezkuak ikusten dittugulako. Urtetan aurrera goiatzenoi sortzen jakun muga eta arazoei maila batian irtenbidia emoten lagunduko leukielako. Hurrengo etorriko diranei ez daukagu proiektu honek martxan ikustia baino opari hobiagorik egitteko biderik. Ea ba asmo horrek gauzatzen diran.

Bide batez, aukera hau aprobetxatuz, danoi desiatzen dotsuet urte berrixa izan deila aberatsa, bake eta zorionian.

LABUR

Santo Tomas eguneko feria egubakoitzean

Herri Ikastetxean azoka jarriko du datorren egubakoitzean, hilak 19, Santo Tomas eguna ospatzeko. Aurten eskolako patioaren eta elizaren arteko gunean jarriko dute feria, eta arratsaldeko egongo da ikusgai. Abereak eta baserriko produktuak egongo dira. Azokaren ostean, gurasoek prestatutako txokolata eta txistorra jango dituzte umeek.

EHNA egiteko aukera egongo da domekan

Euskal Herriko Naziotasun Aitorpena, EHNA, tramitatzeko aukera eskainiko du Bai Euskal Herriari taldeak Antzuolako udaletxeko oso bilkuren aretoan domekan honetan, hilak 14. Hiru argazki eraman beharko dira eta 15 euro ordaindu. Errolda papearak beharrezkoak dira EHNA tramitatzeko, baina antolatzailerak arduratuko dira horietaz. EHNA egiteko ordutegia ondorengoa izango da: goizez 11:00etatik 13:00etara eta arratsaldeko 18:30etik 20:30era.

'Sufrimenduaren mapa' liburuaren aurkezpena

Sabino Ormazabal Elola ekologista eta kazetariak idatzi berri duen *Sufrimenduaren mapa (osatugabea)* liburuaren aurkeztuko du datorren egunean, hilak 18, udaletxeko aretoan, arratsaldeko 19:00etan. Euskal gatazkak eragindako sufrimenduaren erradiografia da liburu. Orain, Sabino Ormazabal Euskal Herriko mugimendu sozialen historia prestatzen ari da, *Gara* egunkarian eszedentzia hartuta. Elkarrik antolatutako ekintza hori. Eguenean bertan sinadura bilketa egingo du. Elkarriren helburua Antzuolan 350 sinadura batzea da.

LANA

Untxien intseminazio zentroa jarriko dute Antzuolan

ENEDIA ITURBE

Hazitarako 200 bat untxi jarriko ditu Gipuzkoako Untxizainen Federazioak Antzuolan. Orain arte ere untxi granja izandako granjaineko Maria Jesus Gonzalezen granja erabiliko du horretarako. Datorren urteko apirillean jarriko dute martxan, konponketa lanak bukatzean.

Maria Jesus Gonzalezek Irainen untxi granja Euskadiko Untxizainen Federazioak erosi du. Maria Jesusek okelatarako untxiak hazten zituen han; Federazioak, aldiz, intseminazio zentroa jarriko du.

Frantzia eta Katalunian onkatutako linea genetiko bereko berrehun bat untxi ar jarriko dituzte granjan. Horiak balio genetiko handikoak izango dira, eta hazitarako erabiliko dituzte.

Euskadiko Federazioak dituen beste granja batzuetako untxi emeak intseminatuko dituzte Antzuolakoan haziarekin. Federaziotik kanpo ez dute zaltuko, ez hazirik, ezta untxirik ere. Juriñe Arroita Federazioko tek-



Hazitarako untxiak jarriko ditu Euskadiko Untxizainen Federazioak Antzuolan.

nikaria arduratuko da Antzuolako granjaz. Bere hitzetan intseminazioak okelatarako untxiak sortzeko lana asko errazten du eta beharrezkoa da.

Apiril inguruan jarriko dute martxan granja. Ordurako dena prest izateko, teiltua konpontzen eta garbiketa egiten ari dira orain.

KIROLA

Pilota txapelketako finalerdiak jokatuko dituzte bihar

Eskuz binakako VII. txapelketa azken txanpan da. Bihar, zapatua, finalerdiak jokatuko dituzte eta datorren zapatuan, hilak 20, finalak. Lehenengo mailako finalerdietako bat jokatu dute jadanik; beraz, badira finalista batzuk: Oruesagasti eta Murua-mendiarrak elosuarra. Zapatuan goizeko 10:00etan hasita jokatuko dituzte beste finalerdiak. Andres Arbulu eta Jose Mari Mendizabal Jon Gurutz Biteri eta Iban Unanueren aurka arituko dira lehenengo, eta, ondoren, bigarren mailako bikoteak.

PARTIDUAK

FUTBOLA

Abenduak 14
12:00: Antzuola-Eibartarrak (Neskak)

PILOTA

Abenduak 13
17:00: Paletaz final erdia.

EMAITZAK

FUTBOLA

Antz. 4 Eibartarrak 2 (2. erre.)

PILOTA

Gipuzkoako txapelketa
Olalde-Gazteleku (eskuz kad.) . 19-22
Olalde-Eskoriatza (eskuz nag.) . 18-22
Olalde-Altzaparrak (paletaz na.) 35-18


ZINEMA

'Shin Chan' emango dute domekan

E.I.

Domekara izaten da umeendako zine emanaldia, arratsaldeko 16:30ean. Normalean Orlaranen izaten da, baina abenduan zehar udaletxean egiten ari dira. Domeka honetan *Shin Chan* filma eskainiko dute; beraz, marrazki bizi-dunetako mutiko bihurriarekin gozatzeko aukera izango dute gaztetxoek.

Datorren astean, Gabonetarako bereziki pentsaturiko filma eskainiko dute, *Esperando la Navidad*. Gainera, zozketa egingo dute zinemara joaten direnen artean. Urteko azkeneko filma *Asterix eta Obelix* izango da. Urtarrilean *Princesa por sorpresa* nagusiagoendako filma, *Atlantis* eta *Simbad* eskainiko dituzte. Emango dituzten film gehienak Walt Disney etxearrenak dira.



Domeka honetan *Shin Chan* emango dute zineman.

Konstituzioaren aurkako pintada

Azkenaldian pintada ugari azaldu dira Antzuolako hormetan, azkenak pasa den asteburuan egindakoak. Espainiako Konstituzioaren eguna izan zen abenduaren 6an eta Aiherra kaleko etxeetako horman *Konstituzio arrotzari intsumisioa* aldarrikapena ikus daiteke orain. Pilotalekuko kanpoko hormetan ere duela gutxi egindako zenbait pintada daude.

Udalak pintadak ezabatzeko asmoa dauka, baina oraindik ez du horren gaineko erabakirik hartu./E.I.



SUKALDEKO ALTZARIAK
Harizki

MUEBLES IGEA

Sukalderako eta bainurako altzariak
Altzari rustikoetan espezializatuak

zabalo
IGELTSEROTZA

Jose Luis Zabalo

Kalegoi 9, 1. solairua
ANTZUOLA.
Tel. 943 76 60 89
Faxa: 943 76 60 14

ZAHAR BERRITZEAK:
Fatxadak
Bainugela eta sukaldea
Lokal komertzialak
Teilatuak

**Eta orain....
GREMIOEN
KOORDINAZIOA**